



焦太史編輯國朝獻徵錄卷之六十目錄

都察院七

巡撫

周忱

王暹

李實

趙文博

鄒昊

唐胄

王大用

張津

李濬

丁璿

羅亨信

盧睿

鄒來學

馬謹

孫曰良

芮釗

宋傑

汪浩

彭誼

畢亨

雷復

楊璿

夏塤

李浩

婁良

孫洪

盛頤

魯能

馬馴

唐瑜

唐珣

劉潺

謝七元

馮俊

孫仁

王嵩

張誥

目錄畢



焦太史編輯國朝獻徵錄卷之六十

都察院七

巡撫

資政大夫工部尚書諡文襄周公忱傳

彭韶

公諱忱字恂如江西吉水人永樂甲申進士時選庶  
吉士二十八人應二十八宿入翰林讀書公亦乞與  
加二十九人授刑部主事預修五經大全諸書陞員  
外郎北京新建太倉命公督運南北畿郡之賦洪熙  
時遷越府長史宣德五年擢工部右侍郎巡撫南直



隸初蘇州府稅糧負欠六七年約七百九十餘萬石  
常松亦然公至詢問父老皆云蘇松舊俗大戶不出  
加耗致小戶連累公乃使大小戶一例加耗官降斛  
斗久失糧長往往私造大入小出公奏行南京工部  
鑄造鐵斛發屬縣依造木斛較勘烙印給與糧長收  
槩於是出入均平始糧長每區設正副三名每歲七  
月赴南京戶部關領勘合及糧完又皆親齎奏繳往  
往勤經半年率多科斂盤費公每區留正副二名輪  
流赴京領回勘合糧完送赴有司差人類繳甚爲省  
便蘇州糧額二百九十餘萬石宣德間詔官田一斗

至二斗以上者減十分之二三斗以上減十分之一  
戶部移文止減抄沒官田古額不准減除公又同知  
府况鍾奏言洪武永樂間抄沒官田人力猶可以勝  
其所不勝者正在古額官田乃減八十餘萬石舊例  
不許團局收糧糧長家自徵收公曰此負欠之由也  
遂令各縣於水次置圍編圍或四五區或六七區總  
聚一處推行止糧長一人總之名曰總收所收者有  
六七萬石或十數萬石定與加耗總徵平米上圍每  
圍設糧頭圍戶各一名管收千石或六百石置立撥  
運文簿支撥起運加耗者正糧一石收平米一石七



斗候起運時酌量支撥如京通等倉以次定支石數  
不等置立綱運文簿聽其搏淺等項費用填註回銷  
若支撥羨餘存積在倉號曰餘米次年餘多則令加  
六徵收又次年益多止令加五除依前撥運外有附  
餘乃令各縣造倉一所名曰濟農將週年撥運剩米  
運入以備賑濟或農民缺食及運夫遭風被盜者賑  
給借納秋成抵斗還官修築圩岸開挑河道人夫關  
納口糧秋成不還其賑卹農民每歲插蒔之際於中  
下二等戶內驗其種田多寡每家給與二石或三石  
一齊給之秋成隨糧還官若遇凶歲則再賑之奸頑  
不還者有司記名不復給借往時裏河運糧軍民相  
半軍則官爲打造淺船分長短中三運長運於淮安  
常盈倉中運於徐州廣運倉短運於臨清廣積倉支  
米一尖一平下船民則自行雇船裝運正糧一石該  
平米二石又船錢一石經年往返多失晨月公乃與  
平江伯陳瑄議奏軍民令於淮安瓜州等處水次對  
船交兌令衛所出給通關付還銷繳在淮安正糧一  
石兌與平米一石五斗瓜州兌與平米一石五斗五  
升各處守備京衛所運糧官軍未曾過江者聽於蘇  
松常鎮等府縣交兌加與過江船錢米二斗豐年米



賤兌與加七五升凶年米貴兌與加六五升襯墊蘆席折米五合方兌船在江或遭風患公又令州縣支糶餘米蓋倉二十餘厰於瓜州江畔遇到船糧搬入收貯聽候交兌畢日量支餘米雇入看守民間馬草每年運赴南京上納若北京每包草一千束該用五百料船一隻人夫十五名草束在船十壞六七所費不貲公奏於通州草場設立官庫每束折收白銀三分一千束止用三十兩若南京則輕齎赴彼買納人皆稱便又北京文武職官俸糧皆領票於南京戶部關支當米賤時一兩可買粟米七八石公因會議奏

准折收金花銀兩納官每兩准米四石解運京庫交收折支京官俸糧其嘉定崑山等處折納官布每疋准正糧一石舊例驗收三斤糧解領布到官率因紗麤十退八九公知之奏稱布疋斤重紗麤其價反賤紗細布輕其價乃高乞不拘斤重務在長闊如式兩頭織造色紗以防盜剪之弊從之各處走過馬匹及鋪陳等件死損多被馬頭科逼民財買補歲無虛日公又創法每田一畝收米一升九合隨糧帶納另厰收貯遇有死損驗馬上中下價直給米備用馬頭科斂之患遂悉正統初淮揚地方被災鹽課虧久公奉



詔巡視乃奏令蘇州等府將撥剩餘米每縣量撥一  
二萬石運赴揚州各鹽場收貯照數出給通關准作  
下年預納秋糧其米在場聽令竈戶將私鹽於附近  
場分上納卽照時價給還糧米食用於時米貴鹽賤  
官得鹽課積聚民得食米安生上下賴之八年大水  
爲諸郡患公預奏量留官糧一二十萬石賑濟其年  
各處低圩岸塍俱被衝坍時水利等官先已裁革公  
奏取曾經任過辦事官量撥一二十員准其歷俸年  
月管修田圩開塞河道畢日送回吏部未半載事完  
俱復舊十四年邊事緊急工部移文成造盛甲腰刀

撫江  
南二  
年十二  
處國  
計通  
融伸  
縮如  
身家  
然真  
經濟  
大才  
占惟  
劉晏  
可以  
方之  
然非

撤袋以數百萬計其盜俱要水磨明亮公取餘米依  
數成造且計水磨明益非遲歲月不可暫令擺錫以  
副急用處事周而敏多類此公在南圻凡二十二年  
由右侍郎轉左侍郎進戶部尚書改工部乃致仕兩  
遭喪皆起復視事上任旣專公又盡心於職爲人謙  
恭不立崖岸言若不出口謀慮深長善采衆論征輸  
皆有常度貢賦未嘗稽欠且有贏餘遇屬郡有荒歉  
卽以便宜從事撥餘米以補不足之數凡官府織造  
供應軍需之類盡出於所積餘米蓋民賦歲一石五  
斗之外漠然不見他役之及已而官府無復科率之



三楊在上何能展布如此即晏亦特載為之主也

叙公政事可與前傳

擾諸縣學校先賢祠各郡橋梁河道多所修葺濬治一切取諸餘米人爭為立生祠沒因以祀之年七十  
三諡文襄其後戶部言濟農餘米失於稽考奏遣曹屬盡括歸之官於是徵需雜然逋負自若人益思公焉贊曰學博而邃禮和而恭茂著才猷爰作司空撫綏南服國計以豐民無移粟歲不知凶惇大成裕沛乎有容沒而尸祝人仰休風二十八宿孰能右公

### 周文襄公傳

周文襄公忱字忱和吉水人永樂甲申進士上方

嚮意文學選曾棨等二十八人讀書文淵閣忱自列

恭看

願與二十八人之數 上覽其奏大喜曰有志之士

也增公為二十九人 宣皇帝時遷工部侍郎會蘇

松列郡逋賦至數十餘萬以公巡撫南直隸公至詢

於民具言夙弊於是均加耗較斛量奏減糧長正副

定為領繳勘合之法民便之會 詔減官田賦戶部

獨減抄沒官田不准除古額公奏減八十餘萬石先

是糧長人自徵收不團局公曰此逋負之繇也公令

水次置囤推糧長一人總之曰總收每歲通計各戶

之夏秋稅及加耗則例填註由帖而戶給之戶自諸

帖赴倉不經里胥囤設糧頭囤戶各一人主之使相



覺察糧長惟職催併官爲監守立撥運文簿支撥起  
運加耗者正糧一石收平米一石七斗如京通等倉  
正米一石支三石臨淮南京等倉以次遞減置綱運  
簿聽註博淺等費回銷其支撥之羨餘者日餘米次  
年餘多減耗加六又次年益多加五猶有附餘令縣  
置一倉貯之名曰濟農以備賑或農乏食及運夫之  
遭風盜者則賑之故事軍民分運其長運者往返踰  
歲農多失業公乃議奏對船交兌又民間運馬草北  
京者所費不貲而草多敗爛公奏請折銀南京輕齎  
買納省費爲倍北京公侯祿米例輸南京使自來受

公曰彼能於南京關支獨不可就支三郡乎遂得減  
耗米六十萬北京文武俸帖於南京賣者苦大賤每  
銀兩可得米七八石公奏請折收金花銀每兩准米  
四石以給官俸正統初淮揚被災鹽課大耗奉 詔  
巡視奏令三郡餘米運赴各鹽場准明年秋稅聽竈  
戶以鹽易米官得鹽課民食米上下交便之有 詔  
絲繪宮殿計用牛膠萬餘斤遣官齎勅督辦時公方  
赴京遇諸塗勅使請還治公言第行自有處至京言  
京庫所貯皮張歲久朽腐請出煎膠應用歸卽撥餘  
米買皮上供以新易舊誠兩便從之十四年兵部索



兵仗數百萬計公出餘米造上明盛須水磨非遲數  
月不可公且沃錫旬日畢辦土木之變虜騎將而都  
城衆議欲焚通州倉以絕虜食公時議事京師請令  
六軍運入都城聽作月糧虜至無所掠而都城食賴  
以足公撫南畿凡二十二年由右侍郎九載考滿轉  
左進戶部尚書改工部致仕景泰二年卒於家諡文  
襄公謙恭言若不出口謀慮深長善采衆論征輸皆  
有常度歲賦無欠且有贏餘他郡荒欠卽以餘米補  
之凡織造上共軍需之類及所過學校先賢祠墓橋  
興治皆資餘米民不知役雖中官王振

亦極重之進其地者無虛日人人得其所欲蓋民歲  
賦之外漠然不見他役之及官府無復科索之擾莫  
不樂業人爭立生祠祀之諸所建明皆爲永例繼公  
者數欲更之而不能也後戶部言餘米失稽考遣使  
盡括歸官由是徵需雜出逋負如故人益思公初公  
至蘇松所屬大饑米價翔貴公遣人四出察米價高  
下江浙湖廣方大熟乃令人橐金至其地故抑其直  
而勿糴且給言吳中米價高甚由是江浙湖廣大賈  
皆販米趨吳中數百艘一時俱集公知四方米已至  
下令發官廩米盡出之以貸民城中米價驟減而四



方米賈乃亦賤糶所至延問父老利病興革或微行  
與田夫野老雜處談時事其丈量崑山田疋馬獨行  
人不知爲巡撫也有善謀者雖卑官賤吏破去崖岸  
開心訪納夜寤則籌度政務有所得輒起書之簡旦  
日卽施行之運船有侵匿乃以遭風告公公言是日  
無風其人大駭服久之乃知公令金焦山寺僧日具  
風水以報其僧皆有資給爲盡力其周詳多此類尤  
善記憶吏於糧稅有所欺隱明日某年撥某處若干  
某年存留若干以籍驗之果然吏驚服以爲神公字  
量恢弘才識通敏練達精密雖古劉晏韓滉幾無以  
踰之其最善者在不執己見務集衆思故所建立皆  
審計利害可施之永久而又身受知眷遇三揚當國  
夏忠靖在戶部故得久於其任言無不從以展布所  
蘊云

文襄公爲侍郎巡撫十九年爲尚書巡撫又三年首  
姓不知有凶荒 朝廷不知有缺乏或問其故曰當  
時濟農倉米常數十萬一遇水旱便奏聞免糧奏上  
無不准所免之數卽以濟農倉補完所以民不知凶  
荒 朝廷不知有缺乏也問當何處得此米曰此有  
二項一奏改南京公侯祿米於各府支關松江省下



運耗十五萬石其一遵 朝命勸借得米六萬石催糧里甲運入濟農倉賑濟補災之外歲有寬餘此米之所以多也又曰每歲臘月徵糧畢新正十五後便有文書來放糧曰此是百姓納與 朝廷餘贍數今還與百姓食用種 朝廷田秋間又納朝廷稅也卽放米每戶率二石不曾有一石時雖云抵斗還官其實多不取先祖言吾家嘗一次領黃豆六石後升合不曾追也予幼時聞此亦不知其曲折如何後閱公年譜及胡祭酒儼濟農倉記始得其詳故時公侯祿米皆請於南京各府運米南京者每石加六斗公請

令其人赴各府就支石與船賈米一斗計所餘石該五斗總得米十五萬石又遵 朝廷勸分之令於秋糧帶徵得米六萬石歲積米共二十一萬石賑濟補災及糧運虧損悉於此出乃知所謂百姓不知有凶荒 朝廷不知有缺乏者誠不知也今文武祿米折徵銀解京已非舊法以石六斗之米而易銀七錢所餘似亦不少况勸借六萬之數每歲帶徵未嘗少減於昔則名雖沒而實猶存也又况得業蕩米歲有增加由六十文鈔而爲米三升由三升而爲五升二合有六勺至六升召佃官租二斗者爲二斗九升三斗



者爲三斗九升矣則歲入所增又不知當幾何也而問之典守率皆茫然不知有知而不言有能稽見此數歲積於倉則近時君子所以勞心焦思朝慮夕畫使人承奉不暇而實無分寸於民者可一洗而空之嗚呼吾安得親見斯人哉

顧東江雜記

濟農倉積米之多近日士大夫皆不信予以所記二事明之成化戊戌歲諸厥皆滿餘米無可着處以七萬石寄積於水次西倉先君可閒公以老人選差監守自戊戌至丁未凡十年始得放閒蓋所積旣多揆陳放支次第不及故也此事予所目見嘉靖甲申操

江伍松月都憲巡歷至松感舊賦詩有采粟陳陳歲四億之句予見而問之曰詩舉成數其實三十七萬幾千石蓋公嘗以常州推府承檄盤倉見此聞今空乏故作此詩也予所見今四十有七年日月頗遠伍公盤糧在弘治壬戌方二十三年爾此言如質之伍公亦弗信也

顧東江雜記

都察院右都御史王暹傳

實錄

都察院右都御史王暹字景暘浙江山陰人永樂戊戌進士改庶吉士授刑部主事遷員外郎歷河南山東陝西三按察司副使進右布政使丁母憂奪情復職正德己巳虜犯京師召至擢都察院右副都御史巡撫順天等府地方久之巡撫河南湖廣及修築河灣轉左副都御史撫安流民陞右都御史考察河南湖廣官吏時兵荒之餘民無以爲生暹所至輒疏其驚疑艱苦之狀乞罷年例買辦及減租稅民頗賴焉後以精力衰憊乞罷歸吏科劾其委靡不振清譽無



聞詔令致仕天順八年八月卒年七十計聞賜祭葬如例遲爲人平易寡欲不事表暴居官孜孜盡心所事所至雖無赫赫名然不失爲君子子繼以蔭爲國子生今官楚府長史

資德大夫都察院右副都御史王公遲墓表

姚夔

上嗣服之初軫念老臣致仕家食者詔特進階一級於是資德大夫都察院致仕右都御史山陰王公獲進一品階居無何以疾卒正寢事聞上憫悼特遣

官諭祭公諱進字景陽別號慎菴宋魏國文正公十

三世孫其居山陰自貞齋扈思陵南渡始曾祖均珍元紹興路令史祖大本考振宗並贈正奉大夫正治卿陝西布政使司右布政使祖妣胡氏妣倪氏俱夫人皆以公貴故公自幼穎敏讀書一目數行俱下由邑庠領永樂甲午鄉薦登戊戌進士第爲翰林庶吉士進元夕詩獲寶楮之賜授刑部主事卓有能譽陞員外郎兩受勅誥之封並及其親用大臣薦擢河南按察司副使丁父憂服闋調山東隨調陝西專督糧儲有勞陞布政使司右布政使綜理繁劇庶務克熙奉勅勸濟得米一百五十餘萬石歲用不歉立范文



正公祠於延安民禱雨輒應咸感公欲立碑紀其德  
公禁止之丁母憂去任吏民請留 上遣官邀諸途  
奪情復任九載秩滿應遷進朝論難其代俾守原職  
以慰陝民賜誥命加贈三代同其官正統乙巳胡馬  
飲蘆溝京師戒嚴 上收用老成人以護根本驛召  
公還陞都察院右副都御史守正陽門嚴飭備禦虜  
不敢近時遠邇軍民驚散聚城下嗷嗷待斃公啓西  
直門悉放入賴以存活者萬計尋勅公安撫順天等  
府及鎮守天壽山陵築立城堡統軍剿賊遂奏罷被  
賊郡縣歲課物料民安之勅公巡撫河南湖廣兼修  
築沙灣悉聽便宜行事保定張普山以妖言煽衆於  
陳州公發兵擒普山誅之事遂定奏修河用工次第  
宜自黑洋山抵蕭縣每十里置鋪專人提督修治仍  
乞減免濟南兗州科差以甦民困未幾陞右副都御  
史公奏開封等府水災其遠年糧草乞量派別州縣  
運納又奏順天山西山東等處復業流民宜令有司  
撫卹寬免糧差又奉勅考察河南湖廣鳳陽官員去  
留唯允又奉勅賑濟河南徐州饑民因奏開封等府  
州縣災傷五十一處乞蠲該年夏稅之半凡所奏  
上皆從之公慮黃河水勢漸及汴城築堤四十餘里



扞其外城用不溺公年幾六十以災異上疏自劾乞  
罷歸田里情懇甚上慨然許之陛辭蒙燕勞遂行  
已而河南官民交章乞留公已去矣既致仕杜門謝  
客優游林泉十餘年而沒享年七十所著有慎菴集  
四十卷奏議二十卷藏於家公爲人剛直不苟居官  
孜孜政務遇事敢爲不徇於私利不撓於權勢人敬  
畏之坐是亦爲人所忌上賴朝廷委任不疑而公亦  
能隨分自效確不爲所動故其所立事業赫然于時  
又能以禮自將急流勇退非有所養能然哉

右都御史合陽李公實傳

何悌

公名實字孟誠姓李氏別號虛菴先世居江西武陵  
高祖印十郎元時以儒起家官潼川路同知曾祖友  
政始來居合州樂善坊因占籍焉祖永恭父祥皆以  
公貴贈封資善大夫都察院右都御史祖母史氏母  
柯氏俱贈封夫人初柯夫人夢巨蛇繞身旣而誕公  
適五月二十日俗以是日爲龍會因以命公小字公  
狀貌豐偉習次高明弱冠時曾商遊江南歸途舟敗  
幾危遂奮業儒術爲郡庠弟子員穎敏之資博洽之  
學瓌奇之文爲一時流輩所推正統辛酉以詩經領



四川省鄉薦明年壬戌第進士乙丑春擢禮科給事中屢上章疏咸切時弊已巳秋英宗皇帝北狩留虜庭景泰庚午公被命歷淮揚諸郡招募義兵二萬餘赴都下策應時有豪猾乘機倡亂爲河道害者公嚴禁以法遂帖然五月進本科都給事中章月數上愛公者戒以宜少慎默恐賈禍公曰吾所任言官也食祿而曠職恥莫大焉何敢爲身謀也聞者愧服六月瓦剌脫脫卜花王太師也先人來議和詔命在京堂上官有如富弼文天祥者往使莫有應者公曰國家養士正備緩急之用况主辱臣死義也其可避

難毅然請行上悅陞公禮部右侍郎克瓦剌正使大理寺少卿羅綺副之公具奏八事皆與虜所當議者上覽之曰事難預度卿至彼隨機應變處之七月一日陞辭面受詔勅賜白金文綺及一品服從一十六人經榆河驛居庸關懷來衛六日過狼山次土木蓋我師失利處再進歷赤城毳帽山獨石開平沙城小黃河九十九海子屢逢虜騎衝斥公語以我天朝使者毋得妄動虜下馬羅拜因爲前導十一日抵也先營相見以賓主禮責以大義氣壯詞直虜酋悅服具乳酪禮甚恭許奉鑾輿南還次日朝見英宗



行在所面定回鑿之計領書辭歸奏換奉迎勅再使  
往還備嘗艱險 英宗還都朝廷嘉公勞績進資善  
大夫都察院右都御史巡撫湖廣賜誥以公所居官  
贈封三代苗寇爲患以兵勦之岷王謀爲不軌擒送  
京師除兇暴安善良恩威並行政化大治五年甲戌  
詔還掌院事風裁凜然六年乙亥春母柯夫人歿守  
制 英宗復辟有忌公者讒之免官家居天順癸未  
鄉人有訟公於朝者逮繫錦衣衛獄時衛使門達擅  
權作威福事忌公威名且入千戶侯爵之譖將不利  
於公一日 英宗坐便殿召達令問公有何言達覆

奏以公云其所言者非臣下所得聞必面陳乃可

英宗俛首泣下因不豫而入達退而懼不敢加害後  
數日 英宗登遐 憲宗嗣統廉知公無辜給還所

沒家貲令冠帶間住甫抵家而父歿將葬陰雨連旬  
公默禱至葬日開霽旣葬復如初人以爲忠孝所感  
成化八年壬辰驛詔赴闕沮於言者復職致仕優游  
田里幾三十年以山水文籍自娛二十一年乙巳八  
月二十七日卒距生永樂癸巳得年七十有三計聞  
遣官造墳布政司諭祭 恩禮備至云

贊曰士生兩間能建立事功者一日識見二日才能



三曰氣節非識見無以燭大機非才能無以當大任  
非氣節無以處大變公也兼而有之所以爲賢諫官  
爲良使臣爲明執法隨用而效聲績炳然或以其使  
北一事方之富鄭公予以爲鄭公當兩國和平之時  
而公適逢天地反覆之際時勢難易必有能辯之者  
嗚呼若公者其亦豪傑之士乎哉

都御史趙公文博行狀

王雲鳳

都御史趙公山西代州人諱文博字子約景泰甲戌  
進士除監察御史謫陝西淳化令遷守衛輝調鞏昌  
陝西布政司右叅政山東右布政左布政都察院  
右副都御史祖妣妣俱贈淑人公爲御史按河南南畿  
副都御史祖妣妣俱贈淑人公爲御史按河南南畿  
有聲景泰丙子偕同列糾奏忠國公石亨罪 英廟  
親訊於別殿下錦衣獄值雷雨之變始得釋謫官以  
去後亨事敗 上悟糾奏者非妄詔吏部簡拔公遂  
守衛輝時境內久旱公禱於神而得雨新孔子廟及



諸生館舍民莫知費所出地瀕河舊有舟六特供藩  
臬意所遣公疏罷之藩臬有欲中以禍者公又疏聞  
朝廷遣官覈之直公改臨洮臨洮雜戎號難治公治  
之如衛輝以薦改鞏昌務殷逋稅積多公至期月而  
治如在臨洮時爲叅政西戎爲寇奉檄督軍竟以捷  
報爲都御史巡撫河南歲凶民艱食公賑貸有方民  
忘其饑陝西流民率聞風來歸公瘁躬竭思以居以  
哺民忘其流千戶席英與其黨爲盜京城懼事覺乃  
晝甲以行都人莫敢攫肆掠於所過地武臣以詔捉  
兵數千躡其後南走千餘里亦莫敢迫至河公以計  
擒之械送京師伏誅有文綺之賜成化丁未罷歸遂  
不復起家居十一年弘治丁巳卒年七十有三



資善大夫都察院右都御史鄒公吳墓志銘

康海

公諱昊字宋大其先鄒衍之後也蓋有仕宋者隨高  
宗南渡居句容來蘇鄉曾祖保保洪武二十三年解  
馬長於寧夏不能歸遂從馬姓娶鈕氏生公祖豫豫  
娶周氏生公父俊俊先娶劉氏生二子矣劉氏卒俊  
鰥居不娶有相上謂曰君之相晚當生貴子於是鄉  
人力勸俊娶乃繼娶楊氏生公公幼與羣兒戲端坐  
高踞指示方略觀勝負以爲樂長者異之十六喪父  
家道浸衰公傭書供母見千戶者優禮秀才奮然曰



秀才亦人爾我奚弗若彼哉於是從周生折節讀書  
顧家貧夜無燈油乃就廟中燈讀之周生言於巡撫  
賈公嘉其志給燈油紙筆後選爲衛學生陳公福慶  
奇之以女妻公弘治乙卯中鄉試高等己未進士拜  
行人鈞陽公時在兵部與之語器之因數訪邊事或  
奏行之三年授江西道監察御史巡按山西揚清激  
濁風裁凜然陞山東按察司僉事尋謫真定推官值  
韃官盜掠行旅人莫敢櫻公曰彼恃騎射爾吾民亦  
能騎射顧吾無以教彼烏敢當吾衆於是懸金示賞  
不數月邏卒皆稱善射諸韃官多被捕獲乃不敢爲

盜俄傳謫公開州判官百姓詣

闕上書留公

先

皇帝允之乃免未幾復遷四川按察司僉事時蜀盜  
藍鄙方劇合四省兵馬勦之無効公之至笑曰將不  
知兵奈何可勝於是擇精兵千人教之分爲四隊各  
立長統之賊來逼城公夜出精騎百人舉砲擊營賊  
內潰我兵奮擊斬首四千餘級蓋用兵以來所絕無  
者軍中皆喜公曰戰雖少勝賊心未寒胡足爲喜遂  
乘勝遄發遇賊大營賊列陣於左伏兵於右公以正  
兵攻左親率精兵千騎擣伏伏兵驚潰自相蹂踐戕  
擊死者不可勝計乃舉火焚柵明日追賊百餘里斬



其首賊方四降者萬人餘黨咸遁公下令曰此後擅  
殺人者抵命於是驅掠從賊者人人皆望生全矣總  
制洪鍾巡撫林俊會舉陞川東道兵備副使及得麥  
子山之捷賊避居川北有兵備副使張思齊與巡撫  
高謀廖麻子欲就招安求臨江市住劄必徙臨江市  
民彼方肯降公曰臨江市蜀襟喉之地上達重叙下  
連湖襄其地饒腴其民富庶徙民養寇咎將誰歸公  
立賞飭兵獨務行勦賊因不敢掠川東而伏漢州平  
壩未幾又集衆至二十萬竟反前約官軍戰皆敗績  
於是賊謀先破中江移兵成都高公懼亟調公往公  
率精兵五千騎日夜追賊賊聞公至遂解中江之危  
而成都無事矣尋 朝廷改命彭公澤總制公與彭  
公合兵擊賊大破賊營斬其賊首廖麻子餘黨復止  
喻老人遁入東鄉山中會科道交章劾高公薦公以  
代遂巡撫四川公與彭公議曰東鄉山大不便騎射  
某請率步兵三萬人深入九真壩劄營四面分布守  
隘賊不能出亦不得擄寇窮而後招降彼必自縛其  
魁至矣公至九真賊果縛喻老人等四十餘人赴軍  
門給票以授降者令自歸鄉里蜀盜遂平彭公曰使  
早用馬公蜀平久矣此凱旋有路松祥與遂寧渠縣



之寇未息各稱萬人皆觀望喻老人爲進止至內江遣火牌入賊營諭利害除松祥等十數人外餘皆聽撫松祥旣擒與遂寧渠縣諸賊相繼捕獲伏誅奏

上升公右副都御史巡撫如故仍賞松祥子慶兒三保爲奴乙亥冬虜亦不刺由西海至松潘張刺蜀民震恐公與總兵官張傑謀招大信小信土番令爲鄉導大軍夜抵虜營虜驚潰遁去獲馬三十餘匹及衣物百十事捷 上加公俸一級茂州番攻城謂城故

乏水公指泉穴得泉揚以示番番人解去歲丙子高拱筠連夔人普法惡鼓惑諸夷僭號據險肆行攻劫

公率兵搗其巢穴降者萬計惟青山寨不下公曰青山寨高而無泉我絕其水口不數日賊當困渴以死何復庸戰遣指揮何定據水口賊志果窘公曰賊今夜當遁可掣南方一面待之於是遣人諭寨夷曰今夔人子殺爾寨首級換水喫數日不下無噍類矣寨相向大哭中夜果下寨走生擒萬餘人渠首悉獲捷

上陞公右都御史蔭子夢鶴錦衣衛百戶時方以副都考滿公與其配及父祖已受三品誥命而蔭子夢陽入監公曰功成身退天之道也累疏乞休不允歲己卯太監劉允奉勅取活佛案下三司措置銀百



中  
事

十萬兩巡按御史唯唯而已公但厚與允往來累月  
略不及銀兩事允差人來議銀兩公曰此中絕有利  
害太監厚我我不忍置太監於水火之中而不採也  
人還告允允異日見公曰公有愛允之言願有以教  
允也公屏去左右與允曰此行果公所願乎曰未也  
至彼果保其中途無虞乎曰未也今日百萬銀兩果  
公自得不以分近幸乎曰未也公今費百萬求佛不  
成 朝廷究極所費能立舉百萬還官乎况此行活  
佛必不可致後患必不可免何以爲他人培克瘡痍  
之民張太虛聲以賈實禍切爲公不取也允流涕稱  
謝明日案下改百萬爲十萬三司驚喜不知事自何  
出公卒不言所以詔允者於人後巡按論允安靜

先帝賜勅獎勵允愈益願爲好人地方不擾公之力  
也後以微事下詔獄今 上卽位特復其官公懇求  
致仕旣得諭旨遂定居長安因自號曰東溪居士明  
年癸未省墓寧夏以宅與兩兄又買田以益之凡送  
終之具咸與處之戊子以復姓上請得允休沐田里  
不求聞達公卿論薦累歲不乏 朝廷將用公而公  
不起矣時嘉靖甲午四月也由生成化乙酉十一月  
享年七十



通議大夫戶部左侍郎贈都察院右都御史西

洲唐公胄神道碑

山東

王弘誨

自予髫髻時見父老談西洲唐公立朝節槩私心嚮往  
之北長入仕中朝與修國史因讀公先後建白諸疏  
乃擊節歎曰嗟夫若西洲公者豈不毅然大丈夫哉  
嘗觀縉紳士夫平居矢口言天下事卽引裾折檻見  
若無難爲者至當國家利害事變之衝輒相率鼠首  
兩端甚則卷舌固位嗟乎此其人視公何如哉公以  
嘉靖戊戌夏議獻皇帝明堂饗禮忤旨詔獄廷  
杖爲民而歸是冬復冠帶踰年而卒隆慶初奉詔



卹錄乃晉公官都察院右都御史賜祭葬如例公諱  
胄字平侯姓唐氏西洲別號也先氏桂林之興安人  
宋淳祐間始祖震刺瓊州卒於瓊子叔建蔭瓊山縣  
尉遂卜城東番蛋里家焉叔建生次道廸功郎瓊州  
戶錄次道生闡瓊州學教授闡生祖壽祖壽生遜本  
州學訓遜生乾昇太學生乾昇生正處士太學生處  
士則公之王父父也俱以公貴贈通議大夫都察院  
右副都御史戶部左侍郎王母吳母陳皆贈淑人公  
生而敏穎於書無所不讀弘治戊午舉於鄉壬戌成  
進士舉皆以禮記魁其經授戶部山西司主事丁外  
艱服闋值逆瑾擅權公謝病不出瑾誅起公復以生  
老乞終養益肆力於學葢家食者幾二十年 肅  
帝入嗣大統始赴召爲戶部河南司主事時蘇杭絨  
造邇遭中貴人往大爲民害公上疏諫止詞甚剴切  
已又疏請出內象又疏爲宋死節諸臣請謚立祠其  
所論列皆有關政體時論躋之癸未春考會試所得  
多名士陞本司員外郎尋擢廣西提學僉事公提學  
以身範士督師生習冠射諸禮卽僻邑遐陬巡歷皆  
遍丙戌陞雲南按察司副使備兵金騰飭號令治軍  
旅境內肅然土酋莽信橫霍莫敢誰何公遣壯士討



禽之逮其黨八人俱論死保山令趙九臯與其子明  
引逆賊劉七餘孽承檄漁民民苦郡吏弗能制公械  
繫之九臯坐盜邊錢糧例斬其首以殉明坐抵命宣  
慰木邦孟養爭地構兵連歲鎮巡議興四省師往討  
之公曰毋煩師是不戰而下乃覈木邦先世與地  
所由諭以國恩木邦感激獻地兵遂寢丁亥改本司  
提學副使其所造士一如西粵時會有尋甸之變總  
制提兵來者柄臣私人也囑公以故人子不聽時三  
司憚其威議迎叅皆跪公獨不從疏乞致仕不允陞  
雲南右叅政己丑表賀如京諸郡邑例餽夫廩皆卻

入受既至見京貴一無所遺上疏請崇聖德 上嘉  
納焉陞本司右布政使壬午入覲陞廣西左其年至  
廣西時桂林盜發喜掘富家塚王府諸巨姓惴惴旦  
夕公計獲渠魁七人誅之古田鳳皇寨韋賊尤大肆  
掠時調土漢兵征之無功公屬其令劉朝輔曰往諭  
吾意天兵不可再于如急來吾能生之朝輔如命往  
賊曰是布政果前提學耶即解甲與朝輔偕至受質  
而還輯其衆境內大安益公往提學時嘗諭諸徭送  
子入學授書遺風猶有存者先是各鎮守將月領銀  
賞徭名鹽魚銀軍器局月支糧給軍名軍匠口糧公



按掌故謂洞首能戢諸徭無掠乃賞今各處警報何  
賞爲祇官吏冒耳軍器局造以年今元年造未已而  
支糧至十二年何也悉禁絕之靖江王府宗人受封  
輒請補祿自登名玉牒日始公曰祿與爵偕應始自  
拜封從前誤也且以靖江一府月補祿米八千石今  
天下諸藩費當何如者遂疏其弊於朝宗室羣齟齬  
之公屹不動尋得 旨俞允通行各藩著爲令蓋公  
在西粵功績殊尤類此他如疏請不隨王府慶賀不  
行王府扣頭朝禮及戢客兵不敢爲暴人聞之皆吐  
舌癸巳陞右副都御史提督南贛汀漳公以開府四  
省重鎮而贛城卑小何以示威乃增築樓櫓雉堞擬  
諸都會按兩廣軍興條例著賞格置湖西道檄守巡  
分駐臨江吉安令緩急可倚官軍遠邇帖然僅半載  
改山東巡撫再乞致仕不允時值旱公焚香祝天行  
藩司分禱嶽瀆諸神連日大雨郡邑多蝗公撰祭文  
命長吏做周禮春秋穰祭是歲無蝗子生盡爲蝦蟆  
蟻子食有蝗飛自邳淮來過沂州不下歲則大熟是  
時公方尋黃河故道以疏三郡水災覈通省荒田給  
民牛種墾之爲世世永利未就而陞南京戶部右侍  
郎丙申春改戶部右侍郎迨秋轉左會安南弗靖



廷議興師往問罪公曰交南道路險絕出師必無成  
功且得其地不可郡縣永樂中事是也因疏力言其  
不可者七事武臣郭勛恬寵請其祖配享功臣廟公  
復疏請止上皆虛已可其奏嗟夫公於君臣之際  
亦已遇矣乃明堂之議聖心有獨契古禮者在廷  
諸臣未必能知公亦坐此不合然肅皇帝之明與  
公之忠皆可以流光千古若公者可謂終不遇乎哉

都御史王公夫用傳

徐觀瀾

王大用字時行正德戊辰進士其先揚之真州人高  
祖某國初以尺籍隸興化衛始爲興化人初授工部  
都水司主事督治漕舟兼理臨清閘座會巨寇劉六  
等嘯聚破濟寧直薄清源大用選勁兵募死士與兵  
備出郭而陣且分道迎擊賊至不利輒引去後擢廣  
東僉事兵備清遠會樂昌高快馬僞稱天王流劫湖  
南彬永等州上命合兵討之大用帥所部將以深  
入疾戰獲功一千四百有奇加俸一級又清遠徭盜  
張甚復帥所部將渡滢江拔旗坑癩利諸寨身得賊



酉梁永寬一人所部將斬首千有餘級又移池水攻黃藤峽黃華洞後山十八山諸巢身得賊酋唐鎮山僞都督楊旺二人所部將斬首二千有餘級復加俸一級陟本司副使仍兵備 世宗登極以征黎蠻夷獠功最寵賜金綺已而累陞廣西左布政入爲順天府尹尋擢都察院右副都御史巡撫順天兵部以大用習塞上事疏請改巡撫大同大用至破巨盜劉善果追得傳首京師迺條備邊四事而議大同三邊一節更切機宜其略曰臣待罪行間得風覽諸鎮他鎮邊垣一帶離鎮不遠於候望易惟大同有大邊二邊三邊大邊離鎮二百餘里二邊一百三十里三邊四十里道里遼曠亭郭睥睨不相屬卒有緩急胡以救助而游徼偵卒恐遠覘爲虜所獲輒伏匿近地以故牒報不符情實而偶爲虜生致者又盡以我軍虛實告之且士卒月廩必具轉車人徒齋至二邊仍多遣將校分部護之率鍾致一石而爲區脫鹵獲不與合移入二邊并力爲便頃之爲給事中秦鰲所論改整勅薊州兵備巡撫順天等郡後綰院都御史缺廷諭具大用名上而御史張祿先時按大同與大用持鈞禮不相下秦鰲之論實張嫉之也旣綰院命下張私



念前過乃撫虛事詆之會朶顏三衛擁達虜千餘詐稱入貢詔大用督叅將周璿蕭陞詣關閱實還報大用乃單騎入城調兵扼險令二將伏所部爲左右翼遲犄之虜謀泄宵遁後復論其酋長幹維者令獻黑谷關地至太平寨延袤五百餘里可繕爲邊垣以省關管大半計議已定而幹維且得專約已與飲盟去張御史劾大用生事構怨坐免久之上復用廷臣推轂起家巡撫四川大用在蜀獲白兔不表聞而地震水旱勤請修省蠲租不置時天子方齋祀太乙羣臣爭上符瑞見大用疏心殊厭之已而擢南京刑

部右侍郎會白草番帥衆攻破平番堡兵科給事中扈永通罪以失事基禍遂坐還籍候勘大用歸以莆中產業不給而真州乃先人世縣也遂老焉年七十五卒於真遺命返葬其後子邦圻世稱爲王生者具先後勛伐疏請葬祭贈廕王生之入請也太宰李默嘗遺書趣之行王生至而李爲趙文華誣繫時分宜相嵩兒世蕃私竊主恩諸先臣子姓以恩澤請者非入千金世蕃屏不奏而王生橐無一錢留徒以蒲伏候謁游其父子間冀或憫惻而予之也後王生久羈謁舍迺從里中士大夫句貸得百金函以餽之世



昔待 往猶 有良 心於 時宰 較勝

蕃訝曰而父苦節若安得有贏金乎麾不內王生歸  
坐舍中咄咄治歸計忽一夕世蕃召之至便室與之  
飲王生素嗜酒敢狂言已而悉如所請疏下聞者傳  
為怪事後知為相嵩於西直嘗召其子語之曰王時  
行一世偉人且數著戰功家甚窶爾無以恒調困其  
兒也

戶部右侍郎兼都察院左僉都御史張津傳

國史實錄

戶部右侍郎兼都察院左僉都御史張津字廣漢廣  
東傳羅人成化丁未進士授建陽縣知縣築城防盜  
建未熹蔡元定諸賢祠置祭田俾其後領之弘治乙  
卯以憂去免喪補大城邑庚申徵拜監察御史疏講  
學慎令等四事正德戊辰擢泉州府知府以忤中使  
去官已巳起知寧波有惠政士民多愛慕之王申遷  
山東左叅政尋超拜南京都察院右僉都御史專理  
操江乙亥轉副都御史巡撫蘇松疏請建儲并言江



南水旱宜停止織造俱不報以征湖州孝豐賊遷戶部右侍郎兼憲職巡撫如故再疏乞休未允以正德十三年五月卒於官計聞賜祭葬以津歷官清慎且有平賊功特贈南京戶部尚書津練達吏事而自守頗正故所至有聲稱云

副都御史李公濬墓志銘

王偉

天生一代聖明之君創業繼統必有忠良之臣以贊襄左右扶顛持危不偶然也曩者宣宗皇帝卽位改元之初會樂安州漢庶謀叛劫衆從已而行在四川道監察御史李公州人也以外艱家居語族人曰吾先世皆以忠孝爲立身傳後之範今吾必不爲叛逆所辱汝等善自裁吾計決矣乃晨夜馳京告變朝廷仗大義以討平之改樂安爲武定州嘉公之忠陞都察院左僉都御史階中順大夫復賜以襲衣綵段實宣德丙午也又二年公膺誥命曰爾中順大夫都



察院左僉都御史李濬擢任風紀清慎廉介當叛逆圖危之初乃心國家首發其謀嘉爾忠誠擢貳憲長授任以來益圖克稱茲特錫之誥命以爲爾榮又八年是爲正統元年今上皇帝嗣承大統簡任賢能勵精圖治時公丁內艱還適遼東守臣懈於邊備虜數寇盜上命在廷大臣舉素有才者一人往撫綏之僉以公爲宜上遂召公往涖其事公至集諸將士宣布朝廷恩威諭以禦戎之道莫重於守於是高城深池謹烽堠鳴刀斗揀精銳士馬分布要害暇則躬親督視屯田區畫措置由是邊儲充實甲兵堅利自瀚海以東悉平以寧上聞而嘉之進公左副都御史階嘉議大夫仍勅公凡事所當行者並以便宜施行公在邊凡八年以目疾乞休致還未幾卒於家計聞上哀悼之遣官諭祭命有司營葬事公諱濬字伯淵自居庠序時已爲輩流推服及升成均擢侍御綽然有聲已而遭際聖明致位都憲小心慎密至誠無僞其在朝則比之石慶在邊則比之趙翁孫可謂明良相逢風雲慶會誠不偶也哉



都察院右副都御史丁公璿傳

陳鎬

丁璿字仲衡上元縣崇禮鄉人祖父世爲農璿生周歲失母十三喪父鞠於祖母馮自少卽知樹立言語動止儼如成人每泣語人曰我幼不能養親長猶可  
以顯親因入應天府庠補弟子員年二十二以明經領鄉薦登進士第改翰林院庶吉士尋授工部主事  
謫戍盧龍久之用知者薦授山東道御史巡徐州使雲南所至歷著聲績宣德乙卯賊首張晉祥作耗璿設策捕獲之正統戊午盜起衛輝劫掠居民璿復承命往捕縛其渠魁餘盡釋令復業一境以安  
英宗



嘉其能陞右僉都御史勅同豐城侯大同宣府督運糧儲時麓川蠻叛官民戰失利召璿馳驛往視之至則會太傅黔國公議用兵便宜十餘事以聞仍勅巡撫雲南兼督饋餉尋以征陸川功陞右副都御史兼巡貴州正統戊辰年六十七乞致仕得旨未行以疾卒卹典有如璿爲人寬厚簡重自幼嗜學篤於踐履及入官公餘猶手不釋卷取歷代名臣行實手錄之以備觀省所著詩文奏疏甚多皆不留稿謫潞河十餘年絕意外慕御史張政過其居適邏者來報聞公失彘今獲盜者需公認璿曰吾家未嘗失彘辭不往政問故璿曰時禁盜者死寧忘吾彘不忍其死也張歎曰公仁人也因薦起爲御史巡陝西時有行人被酒入察院侮罵臬司皆不平請劾奏之璿曰是醉耳不足較也明日行人果請謝君子謂璿德量弘雅不愧古人云



都察院左副都御史羅公亨信傳 黃佐

羅亨信字用實東莞人自幼穎敏好學永樂甲申進士授工科給事中往浙江視水災奏蠲嘉興海鹽崇德三縣稅糧凡五十餘萬石調吏科尋陞右給事中適詿誤連坐謫交趾胥吏九載洪熙改元用太子洗馬張瑛薦起爲監察御史嘗往通州察倉庫之弊誅民之尤無良者數人道路肅然巡按真定等府清軍山西所至有聲宣德中受勅治鈔法京師商賈漸見通用有言亨信堪任方面者詔食按察司僉事俸仍治鈔法宣德乙卯陞右僉都御史命往平涼等處練



兵備邊 上念邊境苦寒璽書慰諭且賜以幣正統  
丙辰與都督趙安率洮岷等衛兵巡邊遇虜安與都  
督蔣貴用都指揮安敬議進撓不行亨信至其營斥  
之曰汝輩受國厚恩臨敵退縮安用汝握重兵爲且  
汝特畏死耳死三尺法孰若死敵貴等色變以糧芻  
不繼爲解卽上章劾貴等老師玩寇敬怯懦不忠侵  
尅軍餉 上命兵部尚書王驥往詢皆如言置貴於  
法斬敬以徇白是將士股栗用命兵出輒獲迤西以  
寧奏捷陞俸一級賚白金及文綺先是聞父喪請歸  
守制 上以邊務方殷奪情視事至是始命馳驛歸  
葬往返皆賜褚幣千緡奉勅巡撫大同宣府總督屯  
種給贍軍餉興利除害爲久安計每歲初秋回京議  
事條奏汰冗官省虛費積邊儲禁私役請修各衛土  
城以絕虜覘伺又言虜酋也先專俟釁端圖爲入寇  
宜預於直北要害增置城衛備之不然恐貽大患議  
者寢不行亡何有土木之難人以爲知微云時叅將  
石亨欲以大同四州七縣之民三丁取一爲兵又有  
勅令軍餘盡撥屯種量畝起科亨信奏言北虜方驕  
邊民疲甚加以邊地瘠薄若如言是絕其衣食而逼  
其逃竄也且當今事勢正宜布恩信以結人心苟絕



其衣食未有得其心者從之戊辰冬進右副都御史  
已巳秋轉左副都御史賚文綺白金有加會也先入  
寇所至州縣文武官皆遁 英廟方北狩人心洶洶  
亨信時在宣府孤城危甚當國者建議趣召宣府總  
戎官率兵入衛京師或欲遂棄其城衆紛然爭就道  
亨信乃毅然仗劔坐當門拒之且下令曰敢有出城  
者手斬之衆遂定城中老稚歡呼曰吾屬生矣因設  
策捍禦虜不敢南人莫不多其功歲庚午以年踰七  
十上章致仕會報宦官喜寧偕虜詣城下議和密遣  
驍將楊俊伏兵擒之虜患乃息 上賜璽書有爲國

除患之褒復賜白金文綺不侔所請是秋回京陛見  
辭益力因免冠叩首 上見其着兜鍪處顛髮皆盡  
乃許焉致仕八年卒年八十有一論曰土木之變社  
稷阡危宣府鎮節一移犬羊必乘間深入天下未可  
知也世謂亨信有安社稷功而忌者僅循常例有遺  
憾焉雖然人臣事君內思盡志盡志之謂忠外思盡  
職盡職之謂功亨信亦惟盡其爲臣者爾而奚靳于  
報也哉



嘉議大夫都察院右副都御史盧公睿墓表

彭時

公諱睿字仲思一字養政姓盧氏系出東漢尚書中郎將植植之後有諱實者宋治平間宦游於吳因徙娶之東陽居焉祖怡仲號松齋先生考原定贈文林郎山西道監察御史加贈中議大夫贊治尹都察院右僉都御史妣賈氏累贈恭人公甫齒而孤賴母賈鞠以成童邑大夫奇之舉充邑庠弟子員應門之暇輒親師友講學學遂有成永樂丁酉領浙江鄉薦辛丑登進士第宣德丙午拜廣東道監察御史丁內艱



起復改山西道公爲御史廉正明決不爲利害所惑  
有土豪被逮法當死主憲某公徇私傳生議公執不  
可乃改讞釋之已而事敗釋者以鬻獄謫戍公之名  
自是顯民有犯法全家徙戍遠其徙也有逸去者後  
得而繫之繫久遇恩宥主憲猶督發配所甚急公曰  
已獲卽遣可也久繫而遇宥可釋不可遣入疏辨之  
卒釋寧家嘗按治於遼囚有訴寃者十三人皆金州  
衛卒與卒長也自言訶知山東民運布花多奸弊因  
合謀執之弗克執反被誣以強盜獄成且二年矣公  
察其實寃悉辯出之十三人者得不死一時令行禁

止下人畏且服之正統丁巳朝廷以大同宣府俱宿  
重兵宜遴選憲臣巡撫衆以公舉特陞都察院右僉  
都御史俾奉勅以行至則嚴法令剷蠹弊節浮費廣  
儲蓄摧強撫弱人賴以安時北虜入貢勢頗張公慮  
其包藏禍心爲後患乃上疏言馭戎之道要在恩威  
相濟恩不施則無以懷遠武不振則無以示威其意  
蓋欲修武備防不虞也識者韙之辛酉改命叅贊寧  
夏軍務寧夏孤懸境外尤爲重鎮公往贊畫戎機不  
懈益勤行視險要增築鳴沙州興武二城列置烽燧  
十餘所益廣屯種繕甲兵較士馬以固邊備而於軍



民利病可施罷者尤盡心焉初授由屯軍不計腴瘠  
衆苦於輸租久矣公視瘠者求閒田益之因教以墾  
闢灌溉之法不數月田皆膏腴耕者利焉間被水災  
輒復具奏蠲租姦不得行軍無苛擾其地舊設儒學  
訓武生春秋二丁恒斂衆錢以祭公懼其瀆且擾也  
因規田二十餘頃請於朝以軍餘佃之歲收租入爲  
常祀費凡區畫邊務出於獨見者章數十上多見施  
行而與總戎會議而行者尤多究其用心一皆理冤  
恤死與正人心關風化之事也以故在鎮年久上下  
悅焉嘗邁風痺疾 上聞驛召至京賜醫藥俾養疾

京邸丙寅春疾少瘥復起西行丁卯賜誥進中議大  
夫贊治尹有廉正通敏之褒贈封考妣妻如例是年  
陞右副都御史己巳秋虜寇大同如公慮時公在寧  
夏以有備故無患是冬 賜金織文綺二表裏白金  
二十兩蓋寵勞之也至是疾復作屢疏乞骸骨庚午  
始得請南還時年六十一矣公爲人天資淳美孝友  
忠厚入無間言居喪奉祭必修古禮而誠意懇惻終  
始無替其於修家譜置祭田凡義所當爲者必勇爲  
之至於聲色勢利則不惟不趨且常避遠之若畏怯  
然居官三十餘年家無餘資其自奉雖儉薄而於待



廣德錄 卷之六  
賓客濟貧困未嘗不豐且厚也家居十有三年乃卒  
卒於天順壬午距生洪武庚午春秋七十有三

通議大夫都察院左副都御史鄒公來學墓志

銘

蕭 鉉

景泰七年七月二十九日都察院左副都御史鄒公  
巡撫蘇松諸郡還京至淮陰驛以疾卒年五十有五  
計聞 上爲之悼惜亟遣官諭祭命有司治葬事旣  
又錫之誥命進階通議大夫祖惠和考希魯俱贈通  
議大夫都察院左副都御史妣俱贈淑人示特恩也  
公諱來學字時敏湖廣麻城人公自幼屹有成人之  
志比長篤問學以春秋中永樂庚子鄉選擢宣德癸  
丑進士拜戶部主事以廉勤通敏稱嘗督軍餉陝西



之鎮蕃條畫有方邊人賴以給足時今靖遠伯王公  
驥以兵部尚書行邊一見器重之既又奉勅以便宜  
總理預備倉糧於淮揚等郡盡心營度聲績綽然還  
陞員外郎靖遠伯征思任發麓川以向者知公也卽  
奏請隨行公督兵當前鋒能出奇制勝降附者不可  
勝計靖遠伯上其功陞郎中受白金文綺寶鏹之賜  
宴勞有加以內艱去尋詔起復陞通政司右叅議俾  
總督永平山海儲待正統己巳虜酋犯順京師戒嚴  
特陞都察院右僉都御史提督永平山海總兵鎮守  
等官軍務及順天永平二郡兵民悉兼撫之凡東北

一帶關隘當修守者聽隨宜處置公申嚴令簡練  
部伍往來要害之處躬親相度整飭之因言承平日  
久武備懈弛關隘非不可守也特以軍士雖多而精  
壯者爲權豪所占不少宜懲艾簡閱之庶克有濟又  
言京師四塞之地而虜酋敢深入者以有險不守故  
也今言者類以斂人畜窖芻粟爲計甚非安攘之策  
臣愚以謂莫若分遣文武大臣有勇智者選在京士  
馬各處關隘振揚聲威首尾相應虜若深入則內外  
夾攻必得其利若徒擁重兵京師倉猝分調未免緩  
不及事之患廷議多躋公言上亦知公果可大用



手勅公率所部精銳趨紫荆關易州偕昌平侯楊洪  
追躡虜後事平復受白金文綺之賜景泰癸酉陞左  
副都御史勅兼提督居庸紫荆倒馬白羊龍泉等關  
凡所在鎮守等官悉聽節制公又建議以謂畿甸迤  
西山川固爲險阻而夷坦者尚多使分閫武臣能日  
就月將以修理之亦可據險而守而往往虛應故事  
訖無成功臣非不知因循者愜人情更張者招物議  
特以邊疆事重不忍坐視偷安也 上深嘉納之甲  
戌秋蘇松常鎮諸郡累言比歲水旱相仍民疫死者  
道路枕藉詔廷臣議舉文職有德望才智者一人往

撫綏之僉謂無如公宜卽日勅公蒞其事公受命遂  
言蘇松之民疲困極矣雖寬卹百方饑者自若乞以  
今年輸京米三十萬石已徵者悉貸予民來秋聽臣  
擘畫償官庶國賦不虧小民得濟 上從其請蘇松

之民聞之大喜公至首發倉廩振饑窮勸農桑修水  
利然又以謂糧莠不薈則嘉穀不遂乃察官吏之奸  
貪與凡大家之暴橫者悉繩以法由是小民咸惜公  
來之晚而奸吏豪家大不便相與飛語以撼之公不  
爲動行之益堅夙夜循行往來不少休竟以憂瘁致  
疾以疾懇辭不允因乞假祭掃許之於是又建議以



謂往年蘇松等郡之糧俱軍兌輸京項因邊警調軍  
征守令民自輸遂至役民十五萬加以盤費之資須  
銀三十萬兩米四十萬石正糧數少淨用數多民所  
以重困也今邊境頗寧軍以無事莫若仍令軍運軍  
用其刀民資以財兩適其便 上可其奏公祭掃畢  
蘇松所行一如去年於是上下翕然化服之無復  
小疵議者而舊疾益臻竟以不起公爲人有機智特  
立不羣平居沈默若無異於人至臨事變決可否反  
覆籌度斷然有一定之見其壯志奇節真可與共成  
勲業者也初公之在山海也雖嘗竭其精力然大率  
行其所無事耳而歲適屢豐邊人樂業朝廷倚以爲  
重比其去章民借留之有司乞留之總帥暨中貴同  
事者交章留之至再三焉其在蘇松也勞動視山海  
數倍不啻蘇松之人不獨稱慕者寡而且有違言何  
哉無他公之在山海久澤之及人者深人信而懷之  
其在蘇松未久澤之及人者淺人未信而懷之得效  
所以異者亦其理宜也使假之年歲奚減山海哉



廣雅

卷之六

四十六





